

Editorial



“Thim ah kipat vak lopi tak taklat”

~1Peter 2: 9

Hepitu Pathian mapuina zalin Damna Aw maban issue mel muthei dinga I um kit tak ziakun Lopina leh chawihawina I biak uh Pathian changta hen! Tulai gingtute hin, I umna mun uh khawi tak ahem ti le hepha talo a, zing leh bang tuak ding, bang hem ka chan ding ti hephalo in, eima sanga midangte hung let ding leh pitin ding lau thawng in ngaituana nei itam tau hi. Naupang ahung khanglian dingte khaw nunga Kochuam, Gam leh Nam sung leh society chuam chuam ah vai hun paw dingte haw, thilpha lam puihuai/kawkmu sangin, ziltilna diklo lam zawk in chi I tupiak sek zaw tau.

A chungu I taklat tak gual un “thim ah kipat vak lopi taklat” theina ding tampi gen ding um maleh anuai ahin neu khat

Nanghaw vang chi teldaw:

Gitlona puk tasa ala himaleu hinle, gitlo thupha chawi ah Pathian lam ki le kitte chu Pathian cha sak ahi kitsek ui. Zia gual ma chun, mihing khat hina dawl in thil I hi khial, I bawl khial thei hi. Ngaituana, nei leh go, sep leh bawl aki-batlo dungzui in khat leh khat kizatua a I sep mun chiat a kit-ilkho ding hi Pathian dawi lam chu ahi.

Thik in thik dangma a tat-hiam gual in, mihing khat

in midang khat hetna a tat-hiam thei hi. Hepina leh nasep pha ah kitilhat in kikhoksak tua chiat hitiu. Mi khenkhatte gual in I kikhawpnateu haisan lo in, kitilhattua chiat hitiu, ni chu anai tai ti la hiat ua leh kitilhat tau in.

Lal thiampu:

Tu hun ahin gingu zosia hi mani insung leh I umna mun chiat ua hin Pathian na isem thei tau hi. I hinkhua ah I khawsak danteu ahin mi ettawntak, za um, lungthim dik-

tak pu, mani ginna kihetchi-
antu ihi ding uhi apawimaw ta
ahi. Chun, I lunggil sia leh pha
hetna chu suthiang in, I taksa'u
le tui thiang ah sil in, ama chu
nai hitiu.

Thilphalo bawlte chun
vaihawmna dik a hiathiam
ngai puau in, Lalpa hawlte
chun vang a hethiam sik sek ui.

Nam thiangtho:

Pathian in a nam mite
dinga atel chuamte chu nei leh
go, sil leh chen, pilna, thiam-
na, hau leh vai in a khen puai.
Ama ah ginum taka hinkhua
mang mite leh dik taka khawsa
mite chu atelzaw ahi. Mihing
khat chun gingu kahi ti hen-
la, hepina, zaidawna, nunnem-
na, thianthona leh hiathiam-
na nei lo in um taleh Pathian
chu ama ah acheng nuam na
diam? Nam lopitak/thiangtho
hitheina dinga chun, aki puk-
te kaitho a, ki hothei dialdial
ah chen khawm ahi. Siamtilbu
ah, “naupang kha kaitho in, la
khut in tu'n la: ama chu nam
thupi tak ah siam ding kahi”,
ti imugual un ei unle ziagual
ahin napha isep ding uh ahi.

Pathian mite ngei chu ihi
tau:

Pathian thutak hetna I
nei nung un gilo kitleu hin, I
gitlonau thawi dam kitna ding
um ta pua'n tin; vaihawmna
lau um tak mun Pathian lun-
gnatna mei a chun kang lum
ziang ding ihiu. Ziaziakchun,
I gitlonteau thai mang ah a
umtheina dingin I lungthim
uh hei danglam in, Pathian
kiang lam ah chun kinung hei
kit in; chutileh, Lalpa a kipat
hihalna hung tung thei in tin;
tichun, eimau a ding ah kig-
uat ki chamna leh kipakna chu
hun sawl ding ahi.

Khangthakte hi a ziltill
hun uh aum a, lungthim uh
leh a ngaituanateu patchawn
guala nem anei lai ua isiam lam
zang piaklo ahi chun hun hung
mualliam pai taleh a lungzing
ding chu nang leh kei hilo ihiu
ahem? I hinkhua ahung khan-
glet theina ding in, nausen pi-
ang limte gualin thagau lam
nawitui thiang chu ducha zing
hitiu.

Lalpa, Israel Pathian
chu pak in um hen la, ama bep
in thil lamdang a bawl sek hi. A
min lopitak kumkhua'n pak in
um henla; khawvel pumpi hi a
lopina'n lua dimsuaak ta hen.

MISSIONARY NASEP DINGDAN (CHANCHINPHA PUANZAKNA) ETDAN THAK A ETNA

*~Rev.Dr.Hangpi Manlun
Moderator, Zou Synod.*

1). Thumapui:

Sappau a ‘Mission’ ti thumal hi Latin pau a ‘Mitto’ pat a kiladawk ahia, a umzia chu ‘Sawl’ tina ahi. Chun, Greek pau in, ‘Apostello’ a kitia, zia chu le ‘Sawl’ tina ma ahikit hi. Zia kipat chun ‘Apostle’ kiti ei pau a ‘Sawlchak’ kiti chu hung piangdawk ahi. A umzia ahileh, sepding/bawlding pawimaw (special) tak nasem ding a, mawpuakna kipia tina ahi. Bible Dictionary khatin, missionary chu, “Sakhua pawl a member khat, mundang a chanchinpha gen dinga kalsuan ahilo leh, zilsaknate, lekhathiamnate, khawtang kilemnate, damtheina leh lampi chuam chuamte zilsakna petu” ati ahi. Chun, ‘missionary’ ti thubul chu 1598 AD-a hung kimangpan ahita, a umzia chu ‘sawldaw’ ahiloleh, ‘thawtdawk’ tina ahi. Missionary ti thumal chu Jesuit pawlte nasem dinga, a sawldaw uh genna inle a la mang masapen u’i.

Khristian ‘Mission’ kiti hin Khristianlote Jesu Khristkianga a puilut ding leh Khrista chanchinpha ginglote kianga gen dinga sawldaw tina ahideu pen hi. Ginglo mi leh a helote kianga Khrista chanchinpha puanna thu genna ahi. Baibul chang kingaknate ahileh, Matt. 28:18-20; Luk 24:46-49; Johan 20:21; Nasepte 1:18-te leh a dangdangte ahiau. Zia bana

chun, Pa’n a chapa Lalpa Jesu a sawl a, Jesu’n a nungzuite a sawl kit a, zia chu Mission um zia diktak ahi. Ziaban ah, Thuthunglui hun lai ah chun Pathian chu thagau mangthai hawl masapen ahi thu I mu’u ahi. Aziak ahileh Adam leh Evi kha Eden huan a Pathian in a kawilai un, neklo ding a ti sia leh pha hiatna thing ga a nek phat un, Pathian in, “Adam

khawi ah la um em” ti’n a ko ah, mithiamte’n chun zia chu Pathian in migilote/ thagau mangthaite ahawlna paukam masapen ahi atiu ahi (Gen. 3:8).

Chun, Pathian in Abraham le midangte a dinga malzawlna hiding in a ko hi (Gen.12). Chuleh, Israelte zosia le leichung pumpi ah vakna tuntuhiding in ala belguat a, ahin Israelte’n, Pathian guatna leh lametnate a sukpitinzaw taklo zia kun, A Chapa Jesu thisan in ei uh kochuamte hi hung phudaw in ei hung telta, tichun, mawpuakna chu kochuamte chungin ahung ngata ahi. Missionary nasep hi Pathian lungchang leh tup-le-ngim (heart beat) ahi.

Tuhin, thagau mi leh mi thupi chuam chuamte’n Missionary nasepna pawimawna a gente uh vak en khawm hitiu.

*Pathian thu thiam, Bonhoeffer in, “Kochuam in chanchinpha a puanzak leh kochuam ti a ki min vua ahi bep hi,” a ti.

. *Alan Richardson in, “Chanchinpha puanjakna nei-lo kochuam chu Mission field

ahi nalai u’i,” a ti hi.

*Emil Brunner in, “Mei chu a kuang phat le, a hinga thil a bawlthei gual in, kochuam le Missionary na a sep phat le a hing ahi bep hi” ati ahi.

*Oswald J. Smith in, “Kochuam damlote damasak kitna damdawi hawipen chu missionary nasep ahi” ati ahi. A genkitna ah chun, “Jesu’n vaithum pangaleh sa-nga pani a sukpong lai ah nungjuite’n mipi sangnga (5000) a vak lai un, ama lamte’n a chang lai un a nununglamten a changnai puau” ati ahi. Zia gual ah chun, ei un le chanchinpha tamveitak I hiat lai un, a hekha nailo khawvel a mitamtak a um u’i” ati ahi.

*H.W. Bucherin, “Hukdamna thu genzing mite lungchang sung ah bangtik lai inle thagau thu ni (nisa) a tum ngai puai” ati ahi.

2). Missionary nasep ding chu thi ding kuan vaithakna ahi.

Lalpa Jesu van ah a kalding kuan in, nungjuite kiangin gamtin in chiaunla nungjuisiam unla, a ging taphawt chu Pa leh Chapa leh Thagau thiango min in baptis un ti’n thu apia’i. (Matt.28:18-

20). Chun, “Pa’n Kei ei sawl gual in nang u le ka hun sawl hi” ati ahi (Johan 20:21). Zia, vaithakna hi thikuan vaithakna le a tithei hi. Pa’n a thikuan ah a chate a vaithakna paukam tileng le genkhiallo ding ihi.

Zia banah, Nasepte 1:8-ah, “Himaleh, Thagau thiangtho chu la chung ua a hungtung phat le, thilhitheina neitan lau; tichun Jerusalem, Judea gam leh Samaria gam leh kawlkil tiang ah, ka thu hi-atpите hung hiding la hiu,”ti’n Lalpa Jesu’n thu apia ahi. Ahin, zia thupiak hi kochuam masate khan a zuilo zia kun, a chung ua bawlsiatna atunlaw ahi. Vangphat umtakin ataizakna lam ua kochuam a phut malam pek ua, igam buai lai ua, ei un le kochuam mun chuam chuam a I phu uh tawk kibang ahi.

3). Mihing man ding in mihing ma a kimang jel hi.

Lalpa Jesu’n le Galilee dil gei ah ngaman Simon leh Andriate unau kiangah mihing man ding in a sawl thu imu’u ahi (Mak.1:16). Mundang ah le migilo hukdamna changte khan midang hukdamna chang nailote kiangah chanchinpha

gen ah thagau mangthai amat thu uh le I mu’u ahi. Philip leh Ethopia pa a kipat khan le imu thei hi (Nasepte 3:27). Chun, Paul inle a hung pianthak zaw apat in a bawldingte chu Anania kipat in Pathian in a hil hi. Pathian nasep hi Pathian in mihingte ma amangcha’i ti i muthei hi.

4). Leichung/Khawvel ah Missionary nasep a kul takzet dan.

Leichung/khawvel i et leh Equatorial gamte khu I et le gam thim penpente in a kilang u’i. Zia gamte lak ahin gingo mi a tam mama u’i. World Christian Encyclopedia 2001-in a taklat danin leichung ah mihing 6,055,049,000-vel umding a hisap ahia, zia laka chun, 100-za ah 24% (percent)-te chu Pathian umlo (Atheism) ti pawl ahiu. Mihing 100-lak 13 (percent)-te chu Hindu sakhua betute ahiu, 100-lak a 8 % (percent)-te chu Buddhist sakhua bia ahi kit ua, ziabanah, 100-lak 17 %- (percent)-te Muslim sakhua zuitute ahikit u’i. Zialak ah chun, Khristiante chu 100-lak 33% (percent)-bep ahiu. India gam ah le Khristiante hi

100-lak 3% (percent)-vel hiding a hisap i hibep ui. I umna uh Manipur ngei hile ei Khristiante hi i tawm mama ui.

Zia banah, khawvel ah kum chengin nausen 12, 1000, 000-vel piang dinga hisap ahi. Thasin in, nausen 336111-vel-ma piang dinga hisap ahi kit a, dakkal khat sungin 14,000-vel piang ding a hisap hikit hi. Chuleh, minute khat sungin 233 sang a tamzaw piang ding a hisap ahia, second khat sung in 3-5 vel bang piang ding in ahisap ahi. Zia a chung nau piangte khu chanchinpha helote ahiau a, a hung pianna insung uh le ginglote a hi tangpi u'i.

5). Chanchinpha nasep/ gen chu kochuamte napi ahi.

Missionary nasep chu kochuamte napipen ahi. Lalpa Jesu'n zia napi chu a mite liangko/khutah a ngak ahi (Matt. 28:19). Zia nasepna hi kochuam piting leh pitinglo kilatna pen ahi. Kochuam chu chanchinpha gendinga phu leh din a hiziakin, zia chu semlo leh ngaisaklo I hichun kochuam thi hiding ihu.

Nidanglai in Sapgamte leh a dangdanga kochuamte'n

ei uh gual in amau tualsung kochuam mai mai chiat ala en in ala buaipita maileu, Missionary haw ala sawllo tamai leu ei un chanchinpha bangtin I heta mai diam uh? Amau inle a hunlai un amau tualsung leh mani nawpsakna ding mai mai ala hawl taleu ei un tuni'n chanchinpha hi mulo ding ihu. Ziakachun, chanchinpha puanzak chu I mawpuaknau a hidan hethiam ah theitawpsua a I sep ding uh ahi.

Chanchinpha gen hi kochuamte nasepna ah bak khak mai hilo in, kochuam pumpi in napi leh theitawpa I sep ding ua I liangko ua kinga ahi. Lalpa Jesun khawvel pum-pi a vei a, ziachu Ama taksa thina leh kipiakna'n a sulang Chiang mama hi. Pathian mite'n mizosia Pathian mi leh sa a hung hitheina ua, a sepna uh ahi. Mei chu a kuanna/katziaka ahing gual in, kochuam le chanchinpha na sep zia kin a hingto zel zel ahi.

Ahin, kochuam pitinglote'n, amau tualsung a kisuklimna ding mai maite a buaipiu a, a kiseng tamthei ma ma sek ui. Zia gual ah kisen-

beina chu Pathian mite sangtak kipiakna inle angai ui. Kochuam a hung pitin le vang chanchinpha puanzakna lam a ngai pawimaw pen sek ui.

6). MISSIONARY NASEPNA ETDANTHAK/NGAIDAN THAK ETNA/SUINA

Amasapen, mission nasepna hu thagau mangthai matna ding a nasepna ahi. Ahin, i pawmdante uh hemil diaklo leh nial diaklo in, tulai khawvel khanto tawh kituakin mission nasepna a, ngaidan thak umte chu igen ding uh ahi. Mission tihi kum zabi 16-na nunglam ah gam thimte (ginglote) gam a missionary nasem ding a sawlte, a sawlna munte leh gamte chu 'Mission field' tiin a kiminvua ui. A umdan ahileh ichenna gam nusia a mundang/gamdang a gospel gendinga kisawlna ahi. Atangpi'n, leichung hi mun ni'n a kikhena, Pathian gam tunna mun leh gamthimte ahi.

Ahin khawvel ahung khanto dungzuiin Pathian thu ah le ngaidan thakte hung piangto zelin, mission chungchah ah le ngaidan thak leh pawmdan thakte ahung umto

zelta hi. Ziate chu vak zilbe hitiu.

6.1). Gamdang awpkhumna lungthim (Colonial Ecclesial Paradism).

Ziagual ngaidan, kinkakna pen chu masang apatin Cyprian in a gendan in," Kochuam pawlam ah hukdamna a um puai" (Extra Ecclesian Nnullasallvis)ati ahi. Masanglai in Sapkangte chun a gam lakna gamte ua Pathian thu le a gento zel zel u'i. Etsakna ding in, Colombus khan America gam (USA) a mudaw lai in, America gam ah tribalte'n sakhua anei puau, tichun, gam a lakna munteu a chu asakhua'u a phutto zelzel u'i. A umdan chu a gam lakna munteu ah gospel le a gen kawmkawm un kochuam le a phutjel u'i.

6.2). Mission leh Culture.

Atangpi'n, culture kiti hi a huap lian mama a, nam khat hindan ahilo leh/chawndan, nam zia ngaidan, chiadan, khawsak dan, leh pawmdan tite in a genthei in ah. Jesu kha Pathian Chapa hile leh Juda mi in ahung pianga, Juda nam chawn (culture & custom)-le

ahung zui hi. Juda dante le hung zil-in, Juda Kut chi chuam chuamte le a hung mang a, Pathian biakin le a kai a. tichun bukim tak in a hung semdawk hi.

Chuleh, culture hi chanchinpha genna dinga van mat pawimaw tak ahi tile I hetmillo ding uh ahi. Chun, gospel hin i culture uh leh a hei danglam seka, I thu hetdan'uh leh ngaidan uh le a hei danglam sek hi. Ahin, missionary tamtakte chun ava sepna gamte ua a chawndan uh (culture)-te uh le a va thengpiak sek ua, apu/apa ua pata a chawndan hawitak takte chu setan vanmat leh hawilo ti'n, amau culture zawk chu zuiding in avahil u'i. Ziagual ngaidan chu igam ua missionary masate'n ala sepdan uh ahin tuni tiang in ei zelpha nalai hi . A chawmkim in genta len i culture uh leh gospel I kisitsak/kinaksak ua tuni tiang ahin kochuam puitu muan um taktakte'n le I culture uh gensia leh gospel daltu gual in a ngai ua a da um mama mai hi.

6.3). Contextualization.

Kum 1970-vel lai apatin

'Contextualization' hi mission nasepna/kochuam nasepna ah matpat ahung hitai. Zia umzia hi ahileh, 'A hun leh amundungzui a Nam dang ahilo leh i va nasepna mun mite hindan leh chawndan uh tawh kituak a Pathian thu vagen' ti len genkhiallo ding ihui. 'Contextual' tawh paukam kinai mama chu ahileh 'Indigenization' hi ahi. A umzia ahileh, 'a gamdungzui a mite hetthiam dinga leh a nam mite nam tawh kituaka gospel in zung a neitheina dinga Pathian thu genna' tite in gen hitiu.

Ziabannah, 'Contextualization' hin a huap lian mama a, azilmiten' chu chini in a khen u'i. Ziate chu: Khatna ah, gospel chu a gam miten a Nam zia uh leh a thil etdan ua kipat ah Chiang taka a hetthiam ua, a nam zia uh mantam takmai chu suselo a, gospel a pawmtheina ding ua, Pathian thu gen ding ahi. Anina in, a guam ua nek leh chak, vaihawmna, khawtang hinkhua siamphat ding ahilo leh puihuai jing kaw a gospel puangzakna chu 'Contextualization' a tikit uh ahi.

6.4). Chanchinpha gen leh khawtang siamphatna leh masawwna.

I Lalpa Jesu Mission chu Luk 4:18-ah, “Gentheite kiang a Chanchinpha gen dingte, saltangte kianga suach-atna thugen dingte, mitthum-te’n khua a mutheina ding leh bawlsiat a umte suachakna dingte” ahi. Zia kipat ahin, Lalpa Jesu chu thagau mangthaite maimai buaipi ding a hung ahilo dan imuthei u’i.

Chuleh, kum 1960-vel apatin unau Roman Catholic leh Protestant kochuam pui-tute’n mihingte khat-leh-khat kikal a kinuaisianate, gentheinate, zawn-nate sukbeina dingin theitawpin pan nasatak in ala’u ahi. Chun, WCC inle khawvel pumpi chu mission field ahi-tai t’in le a puang ui. Mihingte hi Pathian in a siam gual tak a hintheina ding un theitawp in pan a lato zelzel u’i.

Chun, UNO inle mihingte dikna kepbit ding a ngaikhawk gual un, kochuamte’n le a ngaikhawk tau ahi. Tichun, WCC chun 1966-1968 in mission tuppen chu mihingthak (New Humanity) siam

ahi ti a hung gen pan tau ahi. Ziabanah, WCC inle khawtang siamphatna lama kipumpiakna banah, gospel gen a kul in a pawimaw ma ma ahi t’in le a genzing ui. Chuleh, Evangelical lamte’n le gospel gen leh khawtang hinkhua siamphat ding pawimawna nasatakin ahung vei tau ahi. Tichun, kum 1966 in “International Foreign Mission Association” (IFMA) leh “Evangelical Foreign Mission” (EFMA) pangkhawmte chun Evangelical khawmpi lian Wheaton ah anei u’i. A thupi uh chu “Chanchinpha gen leh Khawtang Siamphat ding” ti thupi in amang uh ahi.

1966 in Christianity Today, Billy Graham teamte’n, Berlin khawpi ah Evangelical Khawmpi lian anei ua. Zia-chun, Billy Graham in khawmpi hawwna a, a thugenna ah, “Kochuamte chun Chanchinpha genna I uang bawl ding uh ahi, Jesu kiang ah le mite puilut in ziachun mihing leh khawtang siamphatna lam ah thildang zosia sangin na a semthei zaw’u ahi” ati ahi. Zia kipat ahin, WCC leh Evangelical Pawlten le chanchinpha

genna chu thagau mangthai mai matna dinga nasepna hilo in, khawvel siamphatna lam le a huap kha ahidan alang chi-ang ma ma ahi.

6.5). Kochuamte kipum khatna.

Leichung ah Kochuamte ziagual lawm ah I kikhen thang zeng zung uh hi melmapa Setan dawidan ahi. Kochuam dinlim apat in kochuam kikhenna hi beitheilo in tuni tiang ahin a um jing hi. Kochuamte kipumkhat theina ding WCC chun nasatakin pan alazing hi. Ei India gamsung ngei ah le Church of South India (CSI) leh Church of North India (CNI)-te'n ah le kochuam chuam chuam kigawm uh ahi.

Kochuamte, kipumkhat theina ding chu WCC leh Evangelical pawl chuamchuamte'n le nasatakin pan ala zing u'i. David J. Bosh in, "Gingtute sepkhawmna leh kipum khatna chu Khristiante Mission pawimaw tak ahi" ati ahi. Ziaguala kipum khatna i taksap phatle, mission field ah I nasepna a le haksatna leh buaina ituak ua, gingthakte a ding in le nasatakin buaina a pianglaw sek hi.

A ziak ahileh, i vasepna ah eimau thuginteu (doctrine) iva uang genchiat ua, gingthakte a ding inle kua kochuam leh doctrine chu dikpen ahem ti helo in isulung buai gawp uh ahi.

6). I chennau leichung leh thilsiamte kepbitna.

Mission leh i chennau leichung kepbitna chungchang ah pawimawna chu tulai mission nasepna ah ngaidan thak/guanlut thak ahi. Kochuamte,mission thupi khat ahileh i chennau leichung kepbit leh etkawl ding ahi. Aziak ahileh i chennau leichung leh ei un kijawpmatna nasatak i nei u'i. Chuleh, i chennau leichung a siat a, a bitlo leh eu uh le bit diaklo ding ihu. Arch-bishop Desmond Tu Tu-in, "Leichung khat maimai i nei ua, zia chu i neisun bep bep chu ahin I sukgit ua I suksiat ua leh khawvel dang neitalo ihu" ati a gendik mama ahi.

Chuleh, Pathian in mihingte a siam lai in leichung hi mihingte etkawl ding in thuneina ala pia ahi. Aumzia chu mihingte hitilsiamte vengtu leh enkawl (stewardship) –ah a

kawi a (Gen.1:28-30; 2:5,15,19-20; Ephe.2:10). Zia kipat ahin, thilsiamte venbitna mawpuakna chu mihingte khut ah Pathian in a kawi ahidan i muthei u'i.

7). **Huapzo Mission Nasepna (Holistic Paradism).**

Huapzo Mission nasepna hi tulai ngaidan hawipen ti'n genlen genkhiallo ding ihu.huapzo nasepna hin thagau mangthaite maimai matdinga nasepna ahi pua, Khawtang siamphatte, thilsiamte kepbitte, gingtute kipumkhatna ding leh adangdangte le a huapthei ahi. A umzia ahileh, Mission nasepna chu van gam kaina ding mai hilo in, taksale-thagau siamphatna ding leh khantona huap ahi ding hi. Atangpi'n, huapzou nasepna ah ckhun ziate chu a pangpha ding ahi.

7.i). **Nek-le-chak hawlna chan huap pha'n.**

Nekding chak ding neilote chu nek-leh-chak a hawl ding dant tak a hawl ding danteu i hil ding uh ahi. Thupil khatin, "Migenthei khat kiangah sa-nga sel khat selni man ding sum piak sang in, sa-nga

mat ding dan hil lechin, ama leh ama kitodel ding ahi" ati gual in. Ziakachun, nek leh chak hawl ding dante hil ah panpi thei dan dan ah panpina piak le missionary nasepna hawitak khat ahi.

7.ii). **Tui thiango (clean water).**

Tui thiango a dawn thei ding uh lampi hawlpiaknate leh taksa damtheina ding in a pawimaw ma ma ahi. Leichung ah tui tam gual in kilang maleh tuban kum bangjat jaw hem le, mihingte dawn ding tui taksapna liantak khat tuak ding ihu. Zia haw hile mission nasepna hawi tak khat ahung hita ahi.

7.iii). **Damtheina ngai pawimaw (health and hygiene).**

Mimal hinkhua, innkuan, khawsung leh gamsung chanpha a damtheina ding a panlakna ahi. Zia hin chep leh muam, zu leh sa leh taksa siatheina dingte chanpha huap in a genthei hi.

7.iv). **Thiam zilna (formal education).**

Zia hin thiam zilnate, nasep dante, thaichin dan leh a dangdangte a huapthei ahi.

7.v). Politics lam a kihilna.

Zia hin mipite hawina ding a solkal vaihawmna ah Khristiante gamgi chan hetthiam a panlak ding dan leh laklo ding dan chanpha kihilna nei ding ahi. Panlak takluat ahawilo gual in, ngaisaklo taklua le a hawi diak puai. A ziak a hileh i solkal vaihawmna uh ahawilo leh i Pathian biakna ding nangawn uh le ei subuai in malam I sawn thei ngai puai. Etsakna dingin- i gam buai la iun, Pasion le i biak ding gual un le I bethei puau.Chuleh, election

sin inkochuamte le nasatakin ei sukha sek hi. Ziakachun, kochuamte le politics tawh kisai a kochuam mipite chia ding dan guide line hawitak bawl a a zui ding uh ahi. Ziakachun, hua-pzo mission nasepna ah chun zia a chungate chanpha huap in mission nasepna I chiapi ding ahi.

Lalpan simtute zosiaei malzawl ta hen!

.....xXx.....

PHUNGVUKTU KIBELAP ZEL

Pathian zal in mapuina “DAMNA AW” hi Volume 2 **issue 2**na tiang tungthei ding dinmun ah i um ziak un Lalpa chu pakin um ta hen! Tuchung ahin le “DAMNA AW” panpina dinga tawmngai hun sua *Upa Thienkhomang of S.Kotlian P.C.* in Dangka 3000/- a phungvukna’n a hun pia, **Patron Member** ahita ahi. A chung in Damna Editorial Board sik in kipak thu ka gen ahi.

Damna Aw hi mitawmngaite haw zal in lakman tawmcha in i la chawthei jing ua i kipaknau a sang mama ah, a chung un kipak thu i genlo theilo uh ahi.

**Editor,
Editorial Board.**

Khuga Sadar Presbytery Chanchinpha

Nasepna Thilna/Khualna

(Envisioning the Mission Works of Khuga Sadar Presbytery).

: Rev. S.T.Kaia Vaiphei
Nghathal

Thumapui: Tuchung “Damna Aw” ah sua ding ah katup chu Khuga Sadar Presbytery hi i hung kiphudaw a pat chanchinpha genna nasep i bawl dan uh thilna, ahilo leh khualna lam hi gen ka guat chu ahi. A sappau ah “Envisioning Mission Works” tihin a huapljan a, huap liantak ah khawvel pumpi chanchinpha genna nasepna lam le gennawp um maleh tuchung ahin eima KSP in chanchinpha genna lam bik nung etna/khualna nei hi tiu.

Masang ah KSP.Chanchinpha Nasep Dan:

Tumasang, tichu KSP kiphudaw lim a pat kum 20/30 sung vel, ziachu 1985 tiangvel kha. Zia hun sung hinKSP in ginglo mite tichu namdang lak ah chanchinpha nasepna bik a la nei pua, maleh “Gamthak Board” a la kituu a, nasatak in pan a la lau a, ziate chun eima namsung ah ginglo (non-christian) um nalaite chu vei in, Rev. Haukham, Evan. Paukam, Evan. S.T.Hauva lawi malatnan gingthak tamtak, a diak in kum upa lam, teksia lam zu leh sa ne leh dawn ah sa-aw, dawibawm tamtak khenkek in Pathian a la awisak ua, KSP kochuam phu

in mi tamtak kochuam tamtak a la lalut uh ahi. Zia hun sung hi semtute thalaw mumaltak le um nailo hun ahi. Chun zia hun sung hin M&E fund chuambik le a um nai pua, KSP pastoral fund a umlo leh le-semtuten amau sakhausawk ah a puakdaw ziangsek uh hunlai ahi. Zia hi Rev. Haukham khang ah mission nasepna/chanchinpha nasepna malakdan ti in gen bailam pen ding dan ahi.

Hun Lailung ChanchinphaNasepna:

Zia hi kum 1985 vel a pat in huapsak kit hi tin uh, zia hun sung hi hun haksa, KSP khangthu ah semtutethalaw

le kipiakzawlo hun sung, KSP sung ah kikhenna buaina tun hun sung ahi. Chutia KSP pawlpi nasepna chu a hung haksat laitak in nute, Women Christian Association (WCA) tu ah PWF.(KSP) a kititate hin pan a hunlau a, Pi. Ch-hungi Chairperson hilai in Rev. Haulalven tawh kithua in chanchinpha ginglo mite lak ah gen a hun ngaikhawk pan ua, MPM Missionary pakhat Bina Devi kitichu a la chawm ua, amalemchanlo nung in le midang a la chawmto zel uh ahi. Himaleh mite missionary chawp zing chu lemchanglo ah a gel ziaak un eima Mission Field ngei phudaw ding lung a hun gel pan tau a, zia dungzui ah chun (Yaiphakol) MualkotLeibul in mun pakhat singthum in a la chawu a, inn neukhat le a la sa pan ui. Himaleh a chung ah i gen KSP sung buaina ziaak a khan sunzawm theitalo in a inn kisa chu le bawng umna ding bep po a hung hi phat in phel thaak ahia, a thing leh guate chu Tangmual ah Upa Pumtinthang inn nuai ah kawihe ahi. Tichun, hun chawmkhat sung chu KSP

chanchinpha nasepna chu a hung chawl ta ahi. Zia hun hi Rev. Haulalven khang ah KSP mission nasepna a tithei hi. Zia hun sung a hin Esther Prayer Team (EPT) phudaw ahia, ziat-echun Pathian nasepna ding in Pathianni zingkal anngawl in a neksik uh chanchinphagenna ding in a pedawk sekua, ziachu chanchinpha nasepna sumnak umsun chu ahia, ziachu tuni tiang in a chia zawmpek nalai ahi.

Hun nunglam Mission Nasepna:

Zia hun hi kum 2000 nunglamah KSP in chanchinpha nasepna pan a laknatehuapsak hi tiu. Chanchinpha nasepna hun chawmkhat a la chawlta chu pat thak kitna ding ngaitua in pan a hun la, puitu masate'n MualkotLeibul (Yaiphakol) ah mun a la chawksa'u kha puathak in, inn (Evangelist Quarters) a hunsa, Evangelist a hunkawi a, a munte chawk belap in gam a kek a, chun school le a hun bawl a, a min in "The Good Shepherd English School" ti a sak ahi. Zia chu kum bang hem zat sung chu a hun enkawlto

ahi. Himalehvangsiat um tak khat chu KSP sung buaina zia ah chanchinpha nasepna le a chawl hun sung in PCI (R) te'n kochuam a la phudawk man ua, Biakin le kilawmtak in a la sadawk man tau a, KSP in gingthakmutheina ding ah Gospel Campaign leh chanchinphagenna zia ah gingthak a mute chun le biakin umsa chu a belsek tau a, mun neucha ah biakin panidin khawm la lem a kisaklo zia in school lam a kingaisak (concentrate) zaw ta ahi. Zia lai chun permanent Evangelist 2 le i hung nei ta, chun Mission Field School ah teacherte chu le M&E fund ah kichawm tho a la hui ahi. Tichun Mission nasepna sukhatna ding in M & E Khawmpi kumsin leh mat sek pat a hung hia, ziachu tutiang hin i chia zawmpito pek uh ahi. Khawmpi takleh chanchinphagenna matchak ding in 'Bawmzawwna' leh 'GinnaThutiam' a hun bawl dawka, zia chu tunitiang in chiapi zel ahi.

Tichun Mualkot leibul Mission Field ah chanchinpha nasepna chu lawting taktak theilo ding in mu ahi ta,

School lam la Private English School phatamtak (compete) khelzo ding in a kibawlzo pua, a mun hukna'n bawl ham ham ahi pen hi. Zia hun sung hin Chanchinpha gen taktak theina ding, nasep tak taktheina ding mun ngaitua ahia, Evan. Pautinlam tawh kithua in mun chuam chuam tamtak hawl ahi zing lai in Pathian in i dawtnau ei ngaitak piak ah mun ei piaknau mun chu 'Tispari' hi ahi.

Zia hin ka lungthim ah hung lang chuIsrael chate lua ding ah Kanaan gam Pathian in a piak kha kuama umlonamun awng ahipua, a mun ah a la umsate a kinawdawka wama, gal a do ding uh ngai hi. Ziagualma chun ei un le Pathian in ei piaknaTispari mun ah chanchinpha nasepna i bawl theina ding un daltu tamtak a um a, Naga Baptist te'n nasatak ah ei do in, Mission Field hawwna suang khiphu le eila bawdawka piak in eila paidaw piak ua, amau tawh MBC. Imphal tiang ah Tispari Mission Field thu hi genkhawm ahi. Tichun kinawptuana a hung um phat in a gam chawk

ahia, Evangelist Quarters le sak ngal ahi. Gingthak awl awl in a hung kimu, biakin le sak a hung hi tai.

Mission & Evangelism fund sukhatna ding in KSP inn tin ah Missionary Box nei-chiat ding ah puakdaw kit hia, Khuga Sadar Presbytery in le chanchinphagenna hun ngaisak zawdiak in Sawmakhat zalak ah chengsawm (10%) chu Mission & Evangelism Fund ah mat ding in a hun phalpiak-ta, zia chusupung kit in tuhin zalak ah sawm leh nga (15%) a hung tung ta, chanchinpha gen hi I Lalpau Jesu ei ngansiana lehgingtute sawlna lopi ahi tawh kitawn in tunung leh zia sang ah sangzaw hin kal i suan ding uh le kinep ahi.

Tuhin kochuam tin ah M&E Board le siam ahi ta, chanchinpha nasepna le mum-altak in a chia thei pan ta ahi. Zia hi Rev. S.T.Kaia Vaiphei khang ah KSP chanchinpha nasepna tileu hingdik pen ding ahi.

Tu Hun leh Malam Thiilna:

Hun hung chia zel in KSP chanchinpha nasepna le hung machalto zel in KSP

puitu thakte leh pastor thakte Rev. B. Lala, Rev. T. Manga, Rev. SiamaPhaltual te'n pan nasatak ah hung la to in, Tispari mun le liantawk takchawksa ahi ta, Quarters leh School inn sa in School phudaw a hung hi ta, MualkotLeibul (K.Salam) ah School vangsuk bei ahi ta, a mun hin nute (PWF, KSP) in orphanage a bawl a, School min kha mang in "The Good Shepherd Home" tiin a sang ta ahi. Tuhin Tispari ah hin ngaituana zosia (full concentration) piak ahi ta, pitin teina ding ah panlak ahi zing a, Evangelist leh Evangelist teacherste kawi in ziate chuM&E fund mang ah i chanchinpha genna i chawp-teu chu ahi. Tuhin masang ah i duthusam Field Secretary le a mun ah kawithei ding dinmun in i hung um ta, Lalpa lopina chang ta hen.

M & E in chanchinphai gennau tu sang ah a masawnzawk diak theina ding gelnaziak in "M&E Kikaihuaina Dan" siam ding tia KSP ah a dawtna chu KSP in lemtipi in, ziadana chu siamahi ta, 61st KSP Annual Session chun ei-pawmpiak ta, zia dan dung-

zui ah chun kochuamtinten a nawp ua leh Missionary Box, EPT mang ah Missionary/ Evangelist a kichawpthei ding ua phalpiak ahita, zia chun a tup chu Mission Field dang le kinei belap hen la, chanchinpha nasepna le kiha bawl hen la, KSP hi chanchinpha henailote kiang ah chanchinpha gen kochuam hihen la, missionary tamtak kinei belap leh ti ahi. A chung ah KSP chanchinpha

nasepna i thilnau a hinmimal zosia panlakna gensen ding chi ahi pua, a tangpi ah i khual uh ahia, gen butinglo leh genkhial a um chun simtute ngaithiamna ka hun dawn ahi. Maban ah panlakna ding tamtak i nei nalai ua, “Lalna sem hi tiu e, Lalpa hungkittiang in Lalna, sem hi tiu e, A inn ah chawl ding in”. Lalpa lopina chang ta hen, Amen.

GIN UMNA

~ *T.Upa L.M Vaiphei,*
S. Munnuam

Lalpa Pathian thupiak gual ah Gin-umna hi galzawna thupi chu ahi.

“Taksa lam dawidan vang Pathian tawh kimelmakna ahin, Pathian dan tawh kituakna a umpuai, um le um theilo him ahi. Ziaziakchun, taksa ah umte chun Pathian akipak sak thei puau hi.”
Rom 8: 7-8

Kuama taksa mi hiding I nuam puau ah, himaleh I nasep leh I tawi danteu hi I et phat leh Pathian mite hina sulang tawm ma ma in ka gingchai. Thu mu mallo hial ah gin um zingte chu thil um theilo

hial khat ahi.

Ahinla, mihausa khat ahem in a na semte dingin alem guat ahi leh, a dawisakna ahem, la nawp zia kin la gin-um a ngaita , a kipakna suk bukum bep la ngaitua a , tha chawl um

maleh la kilep pua, la pan ham ham ziak in pachatna la chang ta ahi.

Zia gual ma chun, Pathian in alungsiatna I chung un a latsak ah khros ah ahung thuak mualsua lai ah khan le, “Hepa, ngaidam in a thil bawl uh ahe puau hi” ti’in Pathian kiangin ei pauchap piak nalai ahi. Ziaziakchun, a lungsiatna I chung ua a lat sak zing theina ding in, “Gitlona thatzaw in um kiu in” ti le thupiak I mu ahi.

Aleh, Pathian tawh kicham tak ah I um theina ding un, taksa dawidan tawh kalsuan khawm ngailo, Lalpa Pathian ading ah Ginum, bang gual I um diam? Taksa dawidan ale kibual, Pathian tawh kicham, Hangsan tak ah kimuang ngamte hinkhua chu, lauthawng um tak mai hi zaw diam? Tihi, ei uh gintute ading in gelkhawm tak ting in kahiai.

Joseph chu, mi ngailai tak, gual le pai a pawlnawp laitak. Nute leh pate anglum bep thangai thei bep ahi lai ah chun, engsiatna ziak in a u te’n a zuak dawk tau hi. Nuamlo tun tun in akap ngawi ngawi ta

mai ahi. Himaleh kuama’n ama chu a nung ko kit him him ta puau ahi.

Nunglam zuan ah aki lekitna ding lampi a umlo phat in, lunggel thak a hun nei ta ahi. Hatsatna tampi um maleh, ginum tak ah kalsuan ding a hung ngaituata, alunggel gual ah a ngaituana chu Pathian in ahun he zui ah. Zia haksatna chu Lalpa tawh kalsuan khawm in a ginumna chu zawna lopi tak pian a dawm sang ta ahi.

Gitlona lak ah, Lalpa ading ah I ginumate’u kha, Zawna lopi tak tawh chawisan kham a tingna diam? Tuhi ngaitua thak in ginum tak ah thagau lam hinkhua ah dan ni tak leh chawisan I hi theina ding un Lalpa’n a sim zosiate malsawm taken. “Amen.”

.....xXx.....

MISSION LEH GINGTUTE HINKHUA

Bible Text : Nas. 1:8; Mtt.28:19; Jonah 1:1-11.

~Evan.T.L.Mang Vaiphei

Thumasa:

Mission kiti leh gingtute hinkhua hi a kikhen theilo a hi. Pathian chate i mawpuakna lian pen uh chu, **Khawvel zosia chia a, thil zosia kiang ah chanchinpha gen ding a hi.** Khawvel zosia ti hi ngaikhial thei a hi. Mi pakhat chun khawvel zosia chia in chanchinpha gen suak gaw mawngsan leh thil hitheilo a hi. Lalpa'n eimau hitheina tawh kituak in i sep ding, i sepna mun ding leh i sep dan ding ei guat piak chiat a hi. Gam lak ding tampi a um nalai a, himaleh, gam lak ding tampi um nalai te hi a pheng ah mawk lak ziang thei ahi puai. Lalpa'n eimau mimal gam lakna mun ding ah ei guat piakna hi kichian tak ah hetchian masak a ngai hi. La gam lakna ding ah Lalpa'n a hun guat piakna mun la hiatchian masak lo a, la ut utna, la nawp nawpna mun ah la kuan ziang ahi chun la kiginchak sang in gasua lo thei la hi. Lalpa'n a hun sawlna mun, a hun guat piakna mun la hiatchian masak ding ahi.

David Livingstone chun, **Lalpa'n gam la ding ah ei sawlna mun hi ka melma umna ding ah le ka dawilona gam ahi. Himaleh, Lalpa'n ei sawlna ka hiatchian masak ziak in, ka hepi pen leh ka veinat pen gam, chia kal ka ngaklana mun chu ahi** ati ahi. Missiologist te chun mission nasepna hi pathum in a khen ua, zia chu M1, M2 leh M3 ti ahi.

M1 tihi Missions khatna tina dan a hia, M2 hi Mission panina a hia, M3 chu Mission pathumna leh M4 chu Mission palina tina a hi. Zia M1, M2, M3 leh M4 mangcha in tulai gingtute'n Pathian na i sep dan ding uh vak ngaitua khawm hitiu.

La Gam lakna mun ding chu;*

1. M1 = Jerusalem a hithei hi (Nas.1:8): Jerusalem kiti hi, i umna mun ah nasepna genna

a hi. Zia chu M1 kiti chu a hi. Chanchinpha nasepna hi mun gamla tak ah chia theilote a ding ah le i kiang nai tuam ah sep ding tam tak a um a hi. Zia bep chu hilo in, i umna mun ngei un le sep thei ding tampi a um hi. _Mi tam tak ngaidan in missionary nasepna hi mun chuam gam chuam ah kuan-daw tei tei ding ah ngaituana nei pawl i um uh a hi._A kuan thei um ding, a kuan theilo um ding, a kuan theite a ding a le sep ding um, a kuan theilote a ding ah le sep ding um a hi. Nang, Lalpa'n a hun guatna chu kuandawkhel lo a, in mun ah pang ding ah a hun guat hi kha thei la hi. Bangti sep ding? Pathian thugen tei tei ding ti hilo in, thilpiak leh pauchapna in theitawpsua in la pang thei zing hi. Mission nasepna hi thugen khel khel ding hilo in, _thilpiak leh pauchapna, midangte tilkhona, holimpi ah lamdik kawkmuna_ leh lam chuam chuam in a sep thei zing hi.

2. M2 = Judea gam a hithei hi (Nas.1:8): Judea gam kiti hi, a gamla zaw deu genna a hi.

Pawtdawk theilo a um mun ah sem ding ah mawpuakna neite sang ah gamla zaw ah kuan dingte chu a hui. I chenna gam sung a hem, a gamla zaw deu le hithei a hi. Pathian ei guatna hechianlo a, eimau utna mun, chia nawpna mun leh sep nawp dan dungzui ah chanchinpha nasepna pan i guat zia un, tulai i missionary nasepna hi a maswan thei pua, ga le i sua tak tak theilo uh a hi. Pathian ei guatna hechiantute chun, a mun thu a hem, a mite thu a hem, a nawp a hem, a haksa a hem thu in a buai ngai puau a, bang gual mun hileh le lungawi tak in Pathian guatna dungzui a chia in a sem sek uh a hi. Zia chu gasuana ding ah kalbi po-imaw ma ma chu a hi.

3. M3 = Samari gam a hithei hi (Nas.1:8): Samaria gam chu, i chennau India gamsung state mun chuam chuam a hi thei hi. Neu khat zilna lam leh hetna lam ah a la navak zaw deu te chiana mun ding hikha ding a hi. Ei uh India gamsung et in chanchinpha melma tampi a um nalai ua, ziate kiang ah chanchinpha hiatsak chu i

mawpuaknau a hi. Nang, chia theilo malechin, a chia theite a ding in in mun in, thilpiak leh pauchapna la pang zing thei a hi. Missionary nasepna hi kei a ding ei puai la ti chun bawl khial ding la hi. Zia nasepna hi mi zosia a ding a hi. Himaleh, i sep dan ding, i sepna mun ding leh i sepna ding chu kibang khel lo tei a hi.

4. M4 = Khawvel zosia a hithei hi (Mtt.28:19): Mission khatna, nina, thumna ah mawpuakna changlote a ding ah chun

zia hi Lalpa'n a guatna leh sem ding ah mawpuakna a piakna mun a hi thei hi. A sepna mun dungzui in Lalpa'n a semtu ding le mi chuam chuam a guat jel a hi. Himaleh gingtu mimal tin te hi kei ka pang puai ti thei ding khat chale a um puai. Missionary nasepna hi a mun a nai leh a gamlat thu ah Pathian kipak hilo in, Lalpa'n ei guatna hechian ah i sepna hi Lalpa kipakna a hi. Chun, zia nasepna hi a niam chuam a hem, a sang chuam a hem um a hi puai ti hi hiatmil lo ding a hi. I gam ah gingtute'n i hiat khial ua kilang

chu, gam huam ah kuandawkte hi ngaisan um deu, inn mhn ah semte hi chu dinmun niam deu hileh kilawm ah ngaituana nei hileu hin a kilawm a hi. Lalpatena chu zia dan hi hilo a hi. Mi'n Lalpa guatna hechian a, a dinmun a neu a let ziak hilo a, lungawi tak leh thanuam tak ah a sep chun, zia chu Lalpa kipakna pen a hi. Mission khatna a kipat palina chan ah Lalpa'n eimau panna ding ah ei guat piak dan dungzui jel a i sep ua a hi chun, **Khawvel zosia chia a, thilsiam zosiate kiang ah chanchinpha gen suak hung hi ding a hi.** Mi pakhat in Pathian thupiak a hi ti a khawvel gam tin fan suak gaw jiang leu hin lawting ngailo ding i hi. Himaleh, zia nasepna hi mi chuam chuam, nam chuam chuam, pau chuam chuam, te'n hi theina chuam chuam hung kigawm khawm ah i sep mualsua ding uh a hi ti hemil lo in, Lalpa'n nang leh kei sep ding ah ei guat liak hechian a, kipak tak leh thanuam tak ah sem ding in kal thak suan hitiu.

***Thutawpna:** Lalpa'n nang gamlakna ding ah a hun sawl-

na mun chu - Jerusalem a hem, Juda gam a hem, Samari gam a hem, Khawvel zosia chia ding a hem a hithei hi. Nang, chiana mun ding ah Lalpa'n a hun guat piakna mun ah kha mi-dang sawl ziang lo ding ahi. Jo-

nah kha Nineveh khua'n a sawl a, Tarshish lam in jammang maleh, Lalpa'n a sawlna mun Nineveh a chia masia kha a kuama dang a sawl diak lo ahi kha! Lalpa'n a hin sawlna mun ah chiana chu lawtinna ahi.

PROFILE OF THE NORTH EAST INDIA CHRISTIAN LEADERS

Pu (L) Rev.VS.Liankhopau

1917-1975=58 years

~ Rev. N.Lhungdim, KCC. Dewlahlane

1.Pianbulthusim:

Pu (L) Rev.VS Liankhopau hi Pu (L) Pauzasel Vaiphei leh P. (L) Niangjakim Vaiphei chapa lah a 2 channa ahi. Pakai kum 1917 in Bungkot Vangkho mun' a ahung peng e' 11926 kum in Chongkhoyou kho mun' a lekha ahung simpan e.1932 kum'in Chongkhoyou akon 'in Kangvai kho ahung lhung kit un Kangvai khomuna Pu(L)Tualkhothang Vaipheinoija lekha ahin simjom peh e.

2.Christian hinkho le natoh:

1933 kum'in (L) Pu Khaivung khuta Baptize ahung

hidoh jouvin Pathen natoh dinglunggel anei jehin 1937 kum'in Dr.G Rozier leh Miss Rose in Missionary Evangelist natoh ape lhon'e, Assam mun a Alipoor vel a meilhei ho lah a Alipoor Baptish hon atohsah u ahi. Tupna neithei mi ahi jeh in 1940 kum in Jorhat Bible School mun'a Bible simding in asol tauve.

3.Jinei hinkho:

1943 kum'in Jorhat Bible School a Bible Diploma ahung hidoh thei tah jeh in Pu(L) Thangsum chanuMiss Lamtinkhawl Vaiphei toh

khomun a Houbung dantheng in kichenna anei lhon e. Hiche hi Pathen natong ding a akigot lhingna ahi tai.

4. Pathen natoh kipat:

NEIG Mission chun Bible Graduate ahi jeh in 1945 in Lengluang mun a Evangelist na toh apeuve. Kitah tah a atoh jou phabep in NEIG Mission chun Senvon mun a R. Dala Memorial Bible School khat apat jeh un 1947 a kon in ama chu principal ding in apan sah tauve.

5. Pastor Ordination:

North East India General Mission General Assembly PARBUNG kho mun a 1948 kum in khoppi lenpen a umin hiche khoppi achu hinkho lhum a Pathen na toh theina ding in Pu (L) Rev. Khaivung Vaiphei khut a Pastor lhin hina peh ahi tai. Heche hi hinkho bulhing tah ahi na ahi tai.

6. Senvon to Kangvai:

NEIG-Mission chun Senvon Bible School chu 1953 kumbul akon in Kangvai kho mun ah ahin chonlut kit tauve ajeh chu Senvon chu ningc-hong beh seh ahi jeha Kangvai

mun a ahin chonlut joh u ahi. Pu Rev.VS.Liankhopau chu Bible School a Principalna toh ahin neijom jing e.

7. Bible le la:

Teaching Ministry a um ahi jeh in Vaiphei te Bible nei doh thei ding hi ama gel ahi jeh in ama lamkaiyin Vaiphei New Testament hi ahin sem-doh thei uve. Pathen peh lasem a jong nei hoikhat ahi jeh in adam sung in Vaiphei pau va Paknala-300 valjel asem-doh theiye. Pao them tah mi ahi hetdoh thei lou khop a them ahi atiue.

8. Climate change:

Houbunga jong aphant seh le kikhel na um jui ahi jeh in Kangvai Bible School chu 1957 a kon a Sialmate a chonlut dinga aum tah jeh in ama jong Teaching Ministry chu adalha tan Pastoral Ministry jenga ahinkho **ahin jppbe jing ahi tai.**

9. Khuga Sadar Presbytery :

Pu (L) S.K.Samte toh Manipur Gam Presbytery min in ahin lamkai jinlhon vang in achaina chu mi ama pao cheh a aluttah jeh in aman jong 1972 kum chun Presbyterian church

in North East India hopsunga Presbytery khat akisem doh in hichu Khuga Sadar Presbytery hi ahi jing e.

10. Pathen peh hinkho:

Khuga Sadar Presbytery asempilhing tan kipah tah a vaipoh le thunei anei lai tah in Tahsa damlona khoh tah ahin nei tan akicheh-up sah le CANCER ahi khah jeh in ama tahsanna mun pen chu Burrow Memorial Hospital Alipoor ahin kijen dinga a kalson le damdoh jouta louvin 15th Feb.1975 nikho in ahinkho a bei tai.

Insung hahsat jeh jong hitan tin Kangvai hunglung jou talovin Alipoor Mission munna ahin vuiden taove. Pathian peh cha chanu lhing tah anei in Pathen in hinkho kum 58 apeh sunga kipah tah a atoh thei chan a toh ahi.

Lamkai lui le mihet khat ahi jeh in tohphat man thinunga kipe ho chu anoiya ho cheng hi ahi. Athi nunga Pathianin mihem ho lungsunga avel a geldoh sah a kipaman kipe ho chu ahi le-

(1) *Distinguish Christian service:*

Hmar Christian Diamond Jubilee 1985

(2)*Certificate of appreciation:*

Independent chrch of India Golden Jubilee 2000 A.D

(3) *Certificate of appreciation:*

Evangelical Lutheran church Tapidaw Golden Jubilee-20th Feb.2004”

.....xXx.....

Khawvel ah sep leh bawl ding
la nei chu Thagau Hukdam
ding hi ahi.

~ John Wesley

KILE KITIN AMA ZUI DI'N

~Nu Ngaineihat.
Chairperson PWF.KSP.

Moab gam ah kipat in a mote ni tawh kilekit ding in a hung kipan tau a, Ruth chun, thina longal in nangma tawh ei khen chun, Lalpa'n a nop nop ei law mai zaw hen...Ruth 1:6-18.

Pathian in a mite a taisan ngai puai ti zia Bible chang hin a lang dik ma ma ahi. Juda gam ah kial tung maleh taisan denlo ah malzawlina a vukkit gual hin, Pathian in a chate a taisan den ngailo ahi. Pathian chate a ding ah beidawng a umlo dan aki lang ahi. Lalpa'n a malzawlina bangchan ahem selgu sek maleh, a pekit tho tho sek ahi. Isai 40:3 na, "Lalpa ngakte chu a hatnau siamthak piak ah um ding ahiu" ti hi a dik na ahi.

Banggual in I gitlona ala thuk in lian maleh Pathian hepina a batphaklo a um puai. Jonah 2:10. Jonah chu ngapi gilpi sunga tuisuagiat nuai lam ah um maleh, Pathian kiangin a hung pauchap tan, A lungdawn tawpkhawk in Lalpa chu a ko ta. Lalpa'n a hung dawnhu ta. Ziaphat

chun, Lalpa'n ngapi kiang in a genta'n, tichun, Jonah chu sepho in a lawdawk kitta ahi.

Naomi hin a pawsal leh a chate gel thi nungah, kei ngawn ah inlam kilekit ding chu jachat um intin, kilekit puang ka tia Moab gam in a umden pua. Ziaziak tak chu ahi ahun nunung lam a malzawlina thupi tak a chan khawlawna. Mitamtak khovel thil ah lutthuk talua, pawtdaw kit nuam talo ah umdente chu a manthai khawlaw sek uh ahi.

A pawsal leh a chate thanmun chiasan utlo a, a pawsal kianga kivui ding ah umden sang ah Juda gam ah kilekit a tel zaw. A pawsal leh a chate luang muatsa kidak um takte ngai a Moab gam ah umden sang in Pathian malzawlina chang ua Juda gam ah kilekit a tel zaw ahi. Mithi luang muatsa

leh than kiang vel ah um sang in Pathian kianga um chu a phazawn a lulzaw ahi. Mitam-takte'n khawvel lopina leh melhawina I khiak lateu hi mithi luang leh than gual ah kidak um leh matna beingawn ahi.

1John2:17, khawvel leh a nawpnate hi a mangthai zing hi ti I mu, kumtuang thil sangin khawvel thil, lim kilawm takte leh nawpnate hin ei hip zaw sek ahi.

Naomi hin a pawsal leh a chate thiman Moab gam ala nusia man hileh bawldik ma ma di ahi. Ahinla nusia manlo maleh, a mote khat Ruth tawh Moab gam a nutsia thei uh hi a hamphatna ma ma chu ahi.

Nu leh pate haw, I insung a manthai ma hin Lalpa kiang lam in kilekit hitiu, I cha I nauteu nauchaga in um sak nawt tapuai tiu. A manthai mau in Moab gam nusia tai tiu.

Naomi in Juda gam ah kilekit tup tak tak ahi dan aki latna chu, a umna mun nusia ah akipat daw hi ahi. Kilekit tak tak ding a chu, umna mun apat pawtdaw a, umna luipen nutsia veng veng a ngai hi. Nutsia umlo a kilekit thei ahi puai.

Naomi a dingin a pawsal leh a chate gel than nutsia chu thil haksa tak hi ngei ding ahi. Ahinla Bethlehem a kilekit ding chun, zia thane chu nutsialo theilo ahi. Ziagual ma chun, I thil daw ma ma te puakkhawm thei le hilo I nutsia ding um ngei ding ahi. Nutsia ding thil tam takte chiasan ngam ding in tupna a pawimaw hi. I thil nutsia dingte a diktak in thil kidak um, phatchuamna neilo, umpi den lehin le a phatchuamna ding umta keilo ngawn ahi sek hi.

Naomi'n a mote gel in a zui uh chu a dawipen himaleh, ama a hepi ziaak ua ahiloleh ama apat kinepna a nei ziaak ua a zui ding uh lem asa pua. Haksatna a tuak phat ua leh kinung le kit mai ding ah a zui uh le a ut diak pua. Bangcheng tuak ding hileule thuakngap a, a mau dawitelna ngei ah a zui uh a daw i ziaak ah sawlkit gua ahi dan Ruth in a zui tei teina apat hin aki lang hi.

Pathian in mizosia'n Ama zui leu ti a daw i a, himaleh, mi tamtakte zui nawpna ziaak ahileh, Pathian apat kinepna a neiziak uh leh a nawplai hun

bep ah zui nuam ahiu ti ahiat ziaik in, zui nuam tak tak leh zui tak tak ngaplo ding chetna ding in Matthai 16:24 na kuanle ei zui a nawp leh ama kihemil in, ama Kross kaput in ei zui hen ti in, a nungzuite ding mi a duthusam gual ahi lang hi.

Naomi in a mote gel chia kit ding ah a sawl limlai a khan a paniu ah zui ngei dingin a kigen ua, kaphial in a zui uh ahi. Himaleh, Naomi apat kinepna ding a um puai ti a het phat un, Ruth leh Orpah in a zui nawpna ziaik uh chiantak in ahung kilang dawk ta ahi.

Ruth leh Orpah gual in, Jesu zui kiti chiatleu hinle, I zuina ziaik a kibatlo ziaik in, a lim a chu a ziaik hiatkhen theilo in phatchuam ngaitak ah zui bang malechin le, a tak leh a taklo ahung ki hiatchian hun hung tung ngei ding ahi dan aki lang ahi.

Mi tamtakte'n lunglut ma ma in bang chan ahem a zui ua, himaleh a vaithum suk-punte a nek ziaik bep ua zui ahi ziaik un, kinepna ding dang a um taklo phat leh a zui ngap ta seklo uh ahi. Orpah in Naomi apat kinepna ding um ah ahiat

laisia a zui a, ama apat kinepna ding bangma a um taklo dan a hilchian phat in a chia mangsan gual in, Ei uh le Pathian I zuina ziaik uh, Pathian ahi ziaik hilo in, thil mu ding kinep ziaik ah zui ihi ziaik un, I zui mualsua zo seklo uh ahi.

Mitamtak crusade ahem Revival hun lai ah nuam sa ma ma Jesu Krista nungjui ding ah kipedawk hilehle sawt dai zolote hi Orpah gual ah Naomi zuite ahiu. Matthai 13:20,21 na, Buchi suangsi lei ah kekte chu, thu kigen chu a het phat leh kipak tak ah pawm ngal himaleh, lunggil tak a zung thak saklo ah, sawt umsak zolote, thu ziaik ah sukgentheina bang, haksatna bang a hung um tak leh puk ziang sekte gual ahiu.

Pathian nungzui a taktak leh a lem hiatkhen theina ding ah taklang, Ruth leh Orpah in a talpinu a itdan uh kap hial in a taklang gel gel ua. Thupukna tak tak di ahung hi phat in Orpah in a talpinu a taisan tho tho ahi. A talpinu a hepi a, a ngai a, himaleh bangkim taisan ding hial in a hepi zolo ahi. Ziagual achun, ei

hawn le Jesu I hepi'u a, a gam le I vei ua, a thu le I dawi ua, himaleh thil dang cheng cheng sang ah masa zaw Pathian kawi ding I ngam seklo uh ah. Ei hun lemchang dan a Pathian nasep I gua, I lemchanglo hun, I mu ding channa ding hun ahi phat leh i ki hiatlo sak zel sek ahi. Orpah gual ah Jesu zui I tam ma ma ta ahi.

Naomi in Ruth chu a suapinu Orpah gual a chiasan ding in sawl maleh, a talpinu hinna leh ama hinna akizawp tak ziak in a taisan ut talo ahi. Ei lawi chu thingtang gam leh phaigam ale ka hukdampa zui ka tin, lâ bang inle isa jat jat a, I zui ngam tak tak na diam?

Ruth in a talpinu zui ding ah aki tiam dan leh a zuidan hi Pathian zui didan diktak ala hi ahi. -La chia chia na chiang ka tin ati hin, ahaksa leh a nawpna ale zui a tup tinten ahi. -La giak giak na giak ing ka tin, inhoi leh thupi a phut pua, leikohawm leh kawlhawm ate, gamdai leh gammang ah giak maleh giak pi zel ding ati ahi. -La mite chu ka mite hin tin uh, a namte, achipite leh a

hina zosia zamsan ngap ahi. Ei loi chu I nam I gam, I be I phung, I inkuanpite Pathian sang in I ngai zaw sek ahi. -La Pathian chu ka Pathian hi hen, milim Pathian nusia in Pathian hing a hota ahi. Khawvel lopina leh hawinate hi Pathian sang ah I ngainat zawk lo di ahi. -La thi thina'n thing ka tin, Jesu Krista thina, hepina ziak a mualphotak a kross ah a thina ah thingap ding tiang ah zui a poimaw pen ahi dan ei musak ahi. -Zia chun kivui ing ka- A talpinu kivui na ding mun chu ama kivui na ding in a khaam masa ahi. Jesu kivuina kivui ngap ah a nung zui ding ahi dan ei kok mu ahi. -Thina longal in nangma tawh ei khen chun lalpa'n a nop nop ei law hen- Ama thuneina khel lam ah khen ahi longal leh a talpinu khen lo ah zui ding in a hinna a lan ahi. En le thi tiang ah Ama zui ding in I hinnau lan hitiu.

Naomi monu Ruth hi Jentel ginglo mi ahia. Juda gam ah puilut ding chu thil hitheilo ahia himaleh, a piandan in Jen-

tel ah piang ala himaleh, a tal-
pinu Juda nu ahi gual gual ah hi
ding ah gingtu ah aki piak ziak
in aki tawn pi ta ahi. Naomi in
a monu nuthak a suak sak gual
in, ginglo mite gingtu hiding

ah puilut hi I mawpuak uh ahi.
Naomi hinna/hindan in Ruth
gingtu a puilut gual hin ei haw
le I hindante'u hi ettawn tak
thupitak hisak gawchiat hitiu.

ZAWT NGAILO LAM THAK (Joshua 3:4)

*~By. Rev. K Lala
Salem Veng*

2018 Khristmas thalel taka mangzo in, 2019 kumthak ngaklel tak in I thil ua. Zia I masang ua I masawn zing kumthak hi kumbul apat I zawtdiu hi; Khawvela mihatkhawkhengte leh Government liantakte'n le inche khat cha le a zawt masak thei diaklo uh lamthak, hunthak a kigualchiata I zawtdiu chu ahi.

Chingthei taka zia lamthak zawt dingin kising-saitiu in. I kisik ngawi ngawina diu thilte bawlo dingin chun-glam dawidan en in kalsuan leuhin Thianthona ate, dikna ate midang ettawn tak hinkhua mang dingin ma la leuhin.

Eima mawpuakna chiat ah rawngbawl na ah ngai in missionary na guala sem in, I kamsuakte midangte adinga ngaithak nuam, eima ngeile eisuknat kitlona ding paukamte mat gua hitiu aw. I suangtuana

ah I ngaitua khak keilo a pat haksatna, buaina tung thutte chu thuchuam hileh, mani lampi chiat I zawtnau ahin mani leh mani haksatna kisi-amlo gaw ham ham hi tiu aw unau. La umdan di chu ama chunganga nganla aman hi siksek-na'na.

Eden huan ah Evil leh Adam te'n zingkal nitak ah Pathian tawh hinkhua a mat-teu kha amau dawidan ah lampi a zawttak ziak un ziagual hinkhua mansua ah khawvel

hinkhua ah liangvai leh beidawng ah amat khak gual ua eimau dawidan ngaidan mai ah lamthak zawtlo dingin, Pathian thupiak Cross lam en zingin lamthak zawtzethei dingin Pathian khutah kikawlsak ngamding ah hansanate, Nunnemnate, dawtheinate, Lalpa'n I sualnate ei ngaidam gual in, enle midangte I chanaute, ngaidamthei hinkhawthak, Kimudawna thaktak kumthak hunthak ah lamthak zawtkhawm dial dial theileu hen maw.

Joshua 3:4, thu "Zia lampichu zui khalo lai la hi ziakun, la chiana ding uh lampi la hiattheina dingun. Ahinla amau tawh la kikal uh tawngsangni ah kikak a hi zing ding ahi. Zia sangah naizaw ah chun la zuilo diu ahi" ti'n mipite chuJoshuanthu a pia.

Zia thu hi Israel chate'n Jordan lui a kanmasangni ah Josuan Israel mipite kiangah agen hi tui ei kiang ah a gen ahi. Achia khak keilo nau lamthak zawt ding ahiziak un pilvangtak ah chia dingin dawisak tak in thu a pia ahi. Khawvel ah mizosia kibang

chiat ah hunthak, lamthak leh hinkhawthak ei petu kiangin kipak thu ka gen hi.

PATHIAN NAIH:

Evil eh Adam in Eden huan ah Pathian tawhkitawn ah hinkhua limtak leh thamuang tak ah amat zing lai un, gammang in liangvai hinkhua mang pan ahiu

Sam 73:28 achun kei a dingin vangPathian nai ah um hi a pha ahi.; Lalpa Pathian kihumbitna'n kamang hi, la thilbawl zosiachu ka gen sawn theina dingin" ti'n. Pathian nai ti umzia chu Pathian tawhkitawn timai chu hina. Jakob in "Pathian chu nai un tichun ama'n le hun nai in a tia. Pathian in ei nai hen ti I nawp chun eiman I nai masak (I bel, I ko) ding ahi

Pathian naih phat dan leh pawimawna tamtak gendite laka khenkhat chu; sual lak ah pat bitna a hi. Hindanthiamna a hi'n midang leh Pathian Pathian laka pat ginumna a hi'n minphatna ahi, midangte suthiangtu ahi thei a, thagau lam hinkhua hausakna leh midangte a ding ah malzawl na

tuntu hina a hi. Lungkham-beidawnlai ah leh thina luguam hawlai inle Pathian thamuanna dawnna ahi.

Mangthai thut thei dinmun ah dingzing I hi zia un, sualna a pun dante, hun nunung khawvel tawp thutthei ahi zia kin Pathian I nai zing uh a pawimaw pen a. Zia khawvel dam lai hun ah Pathian naite bawh hinVan ah le Pathian nai ah um dingte hi ding I hui.

PATHIAN NAI PHATDAN.

Lal David hinkhua a pat in : (Sam 51:10-12 sim in).

Lal Davida hinkhua a pat in Pathian nai a phatzia leh Pathian gamlat ah khawvel nai a pawimaw zia a langchian a hi. Lal David hi Israelte Lal lopi pen ahi'n, Pathian nai zing sek ahi zia kin anaupan lai a belam chinlai inle Sakeibaknei leh savawmte le a that thei a. Samuel in thau ah nu zia kha le Pathian umpi zing mi ahi zia a hi. Vangsiat um takin Bethsebi a tat sualpita mai a. Zia chun a insung ua sex matsualna leh chemsau a lensak a. A Lalchutpha hial le lua mumal theilo khawpa um a

ngaita. Zia tawbang hialkhawp dinmun ah dingta maleh Pathian nai phat zia a hechianna, Pathian kiang ah a kitulut a, asual le ngaidam piak ahita. Sam 51na hi I sim thei ding in a hung um khawlaw ta ahi.

Lal David hinkhua apat hinPathian nai a thamuan umzia leh Pathian gamlat a um a thafan umzia a kichian takzet ah. Un-aute Pathian la gamlat palkhak in le, A kiang ah kitulut in la, a kiang ah thupha chawi in ama nai in um lechun, a kiang a ngaidamna leh kipakna leh thamuanna um ahi. Hunthak lampi haw ngailo lamthak, hinkhaw thaka chiate'n lamlui haw ta lo in lamthak a hawzaw sekui. Aigupta nunlui ngailodi'n kilanthakin, Pathian tawh kitawn in Pathian nai zing ingka. Amen.

.....xXx.....

(L) Evan. Pu Tualkhodai Vaiphei (1921-1961)

Chanchin chawmkim

Famta Evangelist Tualkhawdai hi (L) Pu. Lulkai leh (L) Pi. Neinem chapa aneu pen ahi. 1921 in Kangsat khua'n (Chongkhosou khaw kiang) in ala piang hi. Class-iv a passed zaw in, Kangvai Govt. L.P School in, teacher na ala sem in, 1946 kum in "Vaiphei league" chu, "Vaiphei National Organization" (VNO) in 1948 kum in ala umtheng un, VNO President in le 1952-1956 chan ala pang ahi.

1956 kum in Kangvai khua pat in chalgum lam kawlbui lei va bawl in nikhat chu lo kuan ah achia a ahileh, nitak Biakin kikhawp pel-tiang in le ahung kit ta puan, khawnvalpi (Petromax) hal in, Khua mite chun a lo kuanna lam chu a hawl un, achia masate tawh Kangvai lui pal masang in aki tuak un, bang atile zia bang ahin hung vai gei ziang la hem? ti'n adawt uh le lo pam lam ah pauchapna ka nei le ka hai thei puan, Pathian in mak tak in ei pawl in, mak ka sa ma ma ziang hi ti'n mi

zosia chu lim leh kipak tak in chibai abuk hi.

Zia ni kipat chun, Pathian thagau pianthakna nei in khawvel thil ah ala kimat chaknate zosia chu haisan in, Pathian lalgam adingin nasem in ahung ki mang cha ta ahi.

Chutichun, kum 1957 vel ah khan, Khuga Sadar Presbytery Mission in Evangelist nasem dingin Koubrubial ala puak sak ua, zia hun lai vel a chun Koubrubial sung ahin Pathian thu awi ala tam nai puau va, chuleh Mission le Baptis Mission

ala um maleh ala khang lian pua, um leh umlo kithua gual in ala um hi. Ziagual ah Evangelist hina tawh Pathian na ala sem ah nu leh pate, khangthak nungak leh tangval tamtakte kochuam ah amin uh khum in Baptisma le ahung chang tau. Tuni tiang hin, Koubru bialte chu Pathian lalgam ading in khuam pawimaw tak ahung hi tau ahi.

Chun 1959-1960 kum vel ah khan Suangtun khuan Presbyterian Biakin di ala sau ah, ama malat na'n tuni tiang hin le a khutsuak muthei di aum nalai hi.

Ahinla, kum 1961 November tha vel akhan sunglam nat ziak in damlo-na ahun nei ah Doctor kiet sak in, In ah aki kaitua ah thani sung lam damlo in ahung umtai. Zia hun lai ah chun azi le nau nei zo chautak in aum ah, 1961 Christmas chu Suangtun khua mat tei ding ahun vai sawmta dam lo pum pum in azi leh chate tawh Suangtun khua'n Khriemas mangding in Dt. 23rd Dec.1961 in aki pan

dawk tau a, Dt. 24th Dec.1961 Khriemas tunkim zan in Suangtun Biakin ava ki khawm ua, ahung pel phat un ka luchang ana taluai atin atun na pa Pu. Khupneilampa In ah a puilut uh le hung gim deu deu in zan 11:00 pm vel in ahin khua abei tai. Aluang chu Suangtun khua vui dingin athan dite ala chawu zo tauva maleh, apa ahung tun aluang damsa hile leh la hun puak tung tei tei diu ahi ati ziak in, tekse kam nial nuamlo in Dt. 25th Dec.1961 Khriemas ni tak in a chenna Kangvai khua chu puak tung ahin, chun a zing Dt. 26th Dec.1961 ni'n Kangvai thanmual in Rev. Liankhopau in vuiliamna hun mang in leisiat ah aseping cheng semzo in a siamtu Pathian in achawldam sak tai.

(Source: KSP Golden Jubilee Souvenir, 2017)

.....xXx.....

HEPINA

~Tupa Kamneimang
Salem Church

Hepina i tihi khawihungkipan ah banggenna a hi em ti hi vak ngaitua in holim leu hin ti i nuam ahi. hepina iti hi mihingte leh Pathian kal ah kizawpna neitalo gual a i um ban un, eihawte leh imelmateu a kipat ei hukdaw theina ding in Pathian in ngaituana hawitak mai a hung nei a, zia chun Mary chu Thagau Thaingtho in a hung gaisak in zia chun nausen chu hung piang in a min ding in Jesu a sak tau ahi. Zia Pathian ngaituana leh a lunggel iti kha Hepian itiu chu a hi ban in a hung kipatna le hiding in i gingcha ahi.

1. Hepina itiu chu bang genna a hi em?

Hepina chu a dawthei inii). Hepina chi a ngilnei in iii). Hepina chun a thangse pua'n iv). A kipakcha pua'n v). A kisathei pua'n vi). Atawi melsia puai vii) Ama makhua bep a khual pua'n viii), A lungna vak pua'n ix). Phatlona lam a ngaitua pua'n x) Diklona a kipakpi pua'n xi). Thutak vang a kipakpi sek hi xii). bangkim a thuak ham ham in xiii). Bangkim a gingcha'n xiv) Bangkim a kinem in xv). Bangkim a thuak mualsua sek hi (IKor. 13:4-7). Zia Bible chang apat hin Hepina umdan chu ihethei uh ahi.

Ziaziakchun, gingtu hingal a hepina bang ahem tile henailo leh a mat dingdan le helo i umsek uh ahi. Hepina

ziaka hukdam ihitau a hukdm ihinau a kipat chun ei hawn le zia hepina chu inei ua iphatch-uampi'u a, amatdan ithiam uh chu gingtute a dingin a pawimaw ma ma ziang chu ahi.

Kihepitua chiat hitiu hepina hi Pathian a kipat ahingal ah, kuale hepina nei chu Pathian ahin Pathian ahiai. Pathian hepi taphawt in a suapite le a hepidiu ahi (IJn. 4:7-8,20-21). Bible in suapi ati te haw chu kua te ahi diam uh, CROSS a tatna zal achun mizosia hi I suapiu ahi vek ui ti le i he thei kit uh ahi, kuale a suapi hepi chu vak a um zing ahi. (1John 2:9-10). Ziaziakachun hepina nei a um chu dan sukbukim nale ahi kit hi. . Athupiate I zui ua a danthute I sukbukim uh chun van ah I

pau Pathian leh a Chapa Ilal-pau Jesu Khrista ngei chu le kipak ngei ding in I ging cha ahi.

Gingtu I hi nau hi mat dik gua in kisui thak kit leuhin I nuam uh ahi. Ei mau dik kisa maleu hinle adiklo lam pang le I hithei uh ahi. Adik I hawl ua a dawidan a I um uh chun gingtute ading in I hiding him un kahia ahi. Bible I ti hi I thu hiatna leh I thu lakna ahi ziak in Bible a I mu leh I hiat gual ma ah um chu gingtu diktak I hung hithei ding ahi, Bible sim ngailo leh Pathian hing neilo ten le hepina anei un, hepina hi a hau ma ma ui. Ei uh Bible sim zingte leh Pathian hing neite hin Bangziak a hepina hi neilo leh matdan thiamlo I hi diam uh?

Ei mau nawp dan leh phasak dan ah I um ban un, titak takna I neilo ziak uh hiding in ka gingcha ahi.; Amelphat na leh a hawina mai in Pathian ho pua hitiu I mu leh I hiat dan chau in Pathian bel in ama dawu zawng ama kipakna ding lam hawl in hinkhua mangthei leu hin nawp aum hi.

Mihingte leh Vansawlchakte pau in thu gen maleng hepina ka neilo chun dak gi ahem vaikhutbet gi ahem

gual bep ka hi. Thugen theina nei in thuguk zosia hethei in, Tang chawn theina khawp ginna kim nei maleng Hepina Ka neilo chun bangma kahi puai, Kathil nei zosia pezo kei in, kataksa le pedawk ziang maleng hepina ka neilo chun bangma ka lawkpi puai (1Korinth 13:1-3). Gingtu hingal a hepina neilo a um chu bangma I hilo dan Bible apat chu Imu thei in I hethei uh ahi.

Van gam ngaina thu le gen in van gam ngaina late sa sek maleu hinle hepina i neilo chun vangam ngainate khan um zia neilo ding ahi dan Bible apat in chiantak in I hethei uh ahi. Bible in Hepina thu hi agen tam in a ngai khaw ma ma ziang in, gingtute a ding a chun a pawimaw pen ahiziak hiding in I gingcha ahi. Mizosian “Thil ahikhial zaw tak ziak un Pathian lopina a chang zo talo ahi”.(Rome 3:23) Hepina I neilo ziak uh leh hepina I hau lo ziak un Pathian a lopi ding bangtak in a lopi theilo ahi.

Hepina hi matdan I thiam ua a mat di dan tak a I mkat ua chun Pathian lopina I piak nau le hiding in I gingcha ahi. Aman ei hepi ah I gitloteu thu

pha I chawina ding in a chapa a hinkhua chawmcha nei I hi ahun sawl hi. Dawitakte haw nau ahin a hawi theipen le a Pathian in Zia gual lawm ah ei pha theipen a I hinkhuau I mat hepi chun, ei haw le I kihepitua ua Pathian lunglam leh a dawi chiat diu ahi. (1John 4: 10-11) zawng a I um khel a thilpha a zik ahi gual in ei haw le I ki- um ding in I gingchalo ahi . hepi tua chiat diu ahi. Ei ma I Hepina hi thupiak ahiziak kikhawp leh hun sa ziang, mi in thupiak chu i zui ua I mat diu dangte ading le gello aki khawm ahi. Khristian I hi nate hi ki en nuamlote le puak nat dan kihe- thak hitiu in kisui thak kit leu lo hepina chang le neitheilote hin ut a um hi. Hepina ziakin ihu ahi. Lamdik I hil ua thil hukdam I hui a, zia hepina chu pha I kawk mu'u chun zia chu ei hawn le I nei a ngai ahi. Thu- ahi hepina nasep leh hepina piak thak ka piak la hui, kihepiu mat dan dik tak chu. Gingtu I inla keiman nanghaw ka hepi hina hin hepina hi I nei teitei a gual hin nang haw le kihepiu in- ngai hi akikhen thei ding gual (Johan 13:34-35) I kihepiu chun ei puai, gingloten bawn hepina mizosian a nungzui I hui ti hun na a nei ule ei uh gingtu Path- hethei innau. Mi ei hiat thei bep ian hing nei tehin bangtitan hilo in I tup gam I tun theina ah hepina hi neithe ngailo leh ding a chun zia hepina chu I amat ding dam heseklo I hi ken a ngai hi. Zia hepina chu I diam uh, hiat chu I hiau a am- ken khaklo ahi chun I tup gam atna ding mun ah I matlo zia uh chu tung thei khel pua hitiu. uh hiding in I ging cha ahi. Abul lam ah I gen hepina 1-15

Khristian hilo la I nuam tiang I suk latte sia kha mang diak sam puau in, Khristian hi I thei in neithe chiat leu hin nawp tho tho ua le Bible a I mu Mission sung, Kochuam sung, leh I hiat gual un umleu hin a I insung ate hin kituaklona leh hawipen leh a phapen hiding kimuthiamlonate um ding in in ngaituana I nei ahi. Bible in I gingchalo ahi. Ziate sia kha I mihing hinkhua hi sumpi hung nei theilo zia un Mission sung, kilang a mang kit gual leh pa- Kochuam sung, leh insung ate kcha hung pak a vuai kit mai hin buainate ahung um sek ahi. gual in ei la tekhin a ziagual Khristian I hina hin kuama a

lian chuam a umpuai kuama a in kangaitua ah, ei man ti tak-
 neu chuam le a um diak puai. takna nei leu hin chu I gam
 Mizosia hi akibang ahi. I tun- sung uh buainate hi a zia um
 na diu thakhat vek ahi. Nei ding I ging cha ahi. I insung
 ziak leh thiam ziak in le van teu siam tup hitiu in, insung I
 gam chu lut thei ding ei puai. siam tup chiat nak ua le Mis-

Tulai I Khristian hinkhuau sion leh Kochuam sung chu si-
 hi ka ngaitua changle Pathian amtup sa ahi ding ban in kitha
 kipakna chang ding hi um ding kimat, numei pawsal thang-
 in ka gingchalo ahi. Aziak chu tatna leh khamthei bawlte le
 I gindanteu hi I mu leh In hiat tawm deu ding in I gingcha ahi.
 gual ua zuilo leh manglote I hiu Bible in Sodom Leh
 ahi. Ei ma nawp dan leh pha sak Gomora Phatlona leh gitlona
 dan dan a gngte I hiu ahi. Bible a gen sang in le I gamsung uh
 in gingtute a ding ah a gen gual gitlona le phatlona hi huaise
 in I um nau em? Nang ma laki zaw ding in ka gingcha ahi. Ei
 hepi gual in invengteu I hepi uh la Missionary bangzat zat
 nau em, I hepi sek puau a ei man ahem sawl dawk gamte I hiu a
 I nek nak leh lungawi ziang, ei Missionary sawl dawk thei ding
 ma I chanphawt leh phasa ziang I hiu chun ei ma insung I siam-
 te I hiu ahi. Inveng te a ding le up masak phawt uh ngai ding in
 gel zel sek le hin, zia chu ahi ka ngaitua a, khuti leh mizosian
 hepina I ti chu! Pathian inle I nungzui I hi ti ei hethei tanau,
 melmateu akipat ei hukdaw thei ei hiat thei bep uh hilo in I bawl
 nading in lunggel in ngaituana ding leh I sep ding dawl sem I
 hawitak mai hung nei in zia hi ding uh ahi. Thing abul ha
 chun hukdam in I um uh ahi. masalo ah aga Thing abul ha

I khawsak nau lei siat gam masa lo ah aga law I guat ziang
 hi kitha kimatna la uang deu uh chu thil hithei ei puai. A ga
 deu, numei pawsal thangtat- ahoi nading a chun abul I ha
 na la uang deu deu, khamthei masak angai ahi. Chun Thugen
 bawlte la mai ngal deu deu uh, thiam te bang I ngai nau a I thu
 ziate haw hi kangaitua chang ngaithak teu chu bang gual in I
 le Khristian I hi nau hi ti tak lawkpiu in insung siam phat na
 tak na I neilo ziak uh hiding le ei ma hinkhua siamphat nau

in I mang sek nau em? Thu gen- in ka ngai tua ahi. Jesu'n a ki-
 thiam te'n le Bible sung thu ma ang in "Dan Lekhabu'n bang aki
 ahia a gen sek uh, Phat chuam zia em? Bang la simdawk em?"
 pi na nei thei diak lo I hi chun, Atia. Ama chun "Lalpa la Path-
 Thugenthiam te thugen ngai ian chu La lunggil zosia, la han-
 ah I chia sang un Bible hasim ta zosia leh la lungthim zosia la
 a sim in um le hin phat chuam hepi ding ahi, chule nangma la
 na um zaw ding in ka ngaitua kihepi gual in la invengte le la
 ahi. Bible hi I danbu leh Gingtu hepi ding ahi ti ahi' atia. Jesu
 te ading in bangkim kizikna chun la dawnhu dik ma ma hi,
 bu le ahi kit hi akizik te haw zia gual a chun va bawl le chun
 lak ah athu pipen le a poimaw hing in la atia.(Luka 10:26-28)
 pen chu hepina hi ahi. Ziaziak Dan bu ah I mu leh
 a chun I Khristian I hi nau hi I hiat gual un um leu hin hing
 ki enthak in ki bulpat thak kit ding I hui ti chiantak in Bible a
 leu hin ut a um hi. A zia chu patin I hethei uh ahi, ziaziak a
 I gindan teu hi kichei na dan chun nhin I nawp chun Hepina
 gual a I mat uh hile kilawm in nei a ngai ahi. Gingtu I hi nau
 I um zo tau in Ama daw lam hi aman tam ma ma ah thisan a
 leh ama kipak nading lam hawl chawk I hi zia un, hiti gual bep
 zaw lo in ei mau dawidan dan in a gingtu I hi chun thisan man
 Pathian I ho zaw sek uh ahi. Zia chu ditzo khel puai tiu, thupiak
 khawvel dan gual ahin um kiu te mang ding leh zui ding ah
 in la, Pathian daw gual apha thisan ah chawk I hui ei vei . I
 leh pawmtak leh a bukim chu holim nate haw leh a thu I hiat
 la hetheina ding un, la lungth- dan dan I gen te haw sim tute'n
 im uh siamthak a um in, hung I phat chuam pi theina ding
 danglam zaw tau in(Rome 12: un Pathian in I chan chiat uh a
 2) lungthim siam thak a I um ding in mal ei zawl piak ta hen.
 theina ding leh Gamsung, Ko-
 chuam sung, insung buaina'n
 na chup lo na ding in Pathi-
 an in ei hepina thu hi athak in
 ngaitua in gelthak kit in hepina
 hi nei thei leu hin hoi pen ding

.....XXx.....

'DAMNA AW' PHUNGVUKTUTE :

PATRON MEMBERS :

- | | |
|-----------------------|------------------------------|
| 1. Pu P.Vaiphei IAS, | Imphal |
| 2. Upa Henthianthang, | S.Kotlian |
| 3. T.Upa Haulallawm | S.Kotlian |
| 4. Upa Laltinkhup, | HQ. Church, Tuibuang |
| 5. Pi Manliankim, | HQ. Church, Tuibuang |
| 6. Nk. Lalsangpui, | S.Kotlian |
| 7. Upa D. Mina, | Lingsiphai |
| 8. T.Upa Ph. Gena, | Lingsiphai |
| 9. Pu. Khamlal | Saipum |
| 10. Pu Khamliankap | Saipum |
| 11. Pu. S.Kapbawi | New Delhi |
| 12. Upa Genhau | Central Church,Compound veng |

MEMORIAL GIFT :

- | | |
|--------------------------------|--|
| 1. Pi Deem Melody, | Central Church, (Rengkai)
<i>[in loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansomthang | Lingsiphai
<i>[In loving memory of (L) Pu. Henzagen]Pi</i> |
| 4. Pi. Nem Grace Boisi Capvung | Delhi
<i>[In loving memory of (L) Pi Vanlalchhuangi]</i> |

SUPPORTING MEMBERS :

- | | |
|-----------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11.Pu Lemthang | L.Mission Veng |

ENCOURAGERS :

- | | |
|-----------------------|--------------|
| 1. Pu P. Kamneilian, | Lingsiphai |
| 2. Evan Thianlam | Lingsiphai |
| 3. Pastor Kaiminlian, | L. Saronphai |

4. Upa K.Thanga,	Kangvai
5. T.Upa Manglem,	Kangvai
6. Upa S.Bela Capvung,	Kangvai
7. T.Upa David,	HQ Church, Tuibuang
8. T.Upa Khupneu,	HQ Church, Tuibuang
8. T.Upa Zamthamuan	HQ Church. Tuibuang
10. Pu Lamthianlun,	Central Church, Compound Veng,
11. Pu Vendam,	Central Church, Compound Veng,
12. Pu Haudal,	Nghathal
13. Pu Khamliankhual,	Nghathal
14. Pi Mary Vaiphei,	Nghahal
15. Upa Paukholam	Nghathal
16. Pu Tongzahem	Nghathal
17. Pi. Nunmawi	Nghathal
18. Pu Kaikham	Saipum
19. Pu Pauthianlal @ Mengpu,	Saipum
20. Upa Ginneithang,	Saipum
21. Pu Donggen	Saipum
22. T.Upa. Lallawmthang	Saipum
23. Pu.Damthang	Saipum
24. Upa Kaijuanthang	Tangmual
25. Rev. Haulalven	Tangmual
26. Pu Gomang	Tangmual
27. Pu Kamneilal	Tangmual
28. Pu Kaisawmlal	Tangmual
29. Pu Thangneilun	Tangmual
30. Pi Niangphal	Bisanmual

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hieu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in ₹. 3,000/-
(ii). Supporting member- Kum 1(one) a ding in ₹. 1,000/-
(iii). Memorial Gift- Kum 1(one) a ding in ₹. 1,000/-
(iv). Encourager- Kum 1(one) a ding in ₹. 500/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, ccpur

CIF nos: 86412486695

IFSC nos: SBINOOO6182.